

Na osnovu člana 8. stav (1) Zakona o uvozu i izvozu oružja i vojne opreme i kontrole izvoza i uvoza proizvoda dvojne namjene ("Službeni glasnik BiH", broj 5/03, 14/03, 33/03 i 14/05), člana 61. stav (2) Zakona o upravi ("Službeni glasnik BiH", broj 32/02), a u skladu sa Zajedničkom listom vojne opreme obuhvaćene pravilima ponašanja Evropske unije o postupanju kod izvoza oružja ("Službeni glasnik BiH", broj 9/03), ministar vanjske trgovine i ekonomskih odnosa donosi

UPUTSTVO

O NAČINU I POSTUPKU REGULIRANJA PRIVREMENOG UVOZA, PRIVREMENOG IZVOZA I TRANZITA SPORTSKOG I LOVAČKOG ORUŽJA I MUNICIJE

Član 1.

Ovim uputstvom regulira se način i postupak privremenog uvoza, privremenog izvoza i tranzita sportskog i lovačkog oružja i municije (u daljnjem tekstu: privremeni uvoz, izvoz i tranzit) za potrebe učešća na organiziranim treninzima, takmičenjima i bavljenjem lovom.

Član 2.

(1) Pojmovi upotrijebljeni u ovom uputstvu imaju slijedeće značenje:

- a) sportsko oružje je dugo vatreno oružje glatkih cijevi do kalibra 12 mm, užljebljenih cijevi do kalibra 8,61 mm, odnosno 0,338 inča i kratko oružje do kalibra 11,43 mm, odnosno 0,45 inča;
- b) lovačko oružje je lovačka puška kalibra 4 - 36 (glatka cijev) ili lovački karabin kalibra 6,5-8 mm (užljebljena cijev) koji se koristi radi bavljenja lovom;
- c) malokalibarsko oružje su sve vrste pušaka i pištolja koji koriste municiju kalibra 5,6 mm;
- d) vazdušno oružje su sve vrste pušaka i pištolja koji snagom zraka pod pritiskom ili drugog plina izbacuje kroz cijev kuglicu (dijabolo) kalibra 4,5 mm;
- e) municija čija je osnovna namjena korištenje za sportsko i lovačko oružje odnosno kalibre i tipove municije navedene u tačkama a), b), c), i d) ovog stava;
- f) organizirani treninzi, takmičenje i bavljenje lovom su sportske i druge manifestacije koje se organiziraju u inostranstvu odnosno u Bosni i Hercegovini na koje su, od strane organizatora, pozvani članovi nacionalnih strukovnih sportskih saveza (streljačkog ili skijaškog- bijatlonskog), odnosno članovi lovačkih udruženja.

(2) Oružja iz tačke a), b), c), i d) stava (1) ovog člana ne smiju biti posebno namijenjena za vojnu, odnosno policijsku upotrebu ili tipa potpune automatske paljbe.

Član 3.

(1) Odobrenje za privremeni uvoz, privremeni izvoz i tranzit daje carinski službenik, na zahtjev fizičkog ili pravnog lica.

(2) Zahtjev iz stava (1) ovog člana sadrži naročito i to:

- a) ime i prezime osobe koja rukuje oružjem;
- b) adresu na koju se oružje otprema ili transportuje;
- c) dokument o identifikaciji sportskog i lovačkog oružja, i to:
 - 1) za sportsko oružje - Lista oružja, opreme za oružje i municiju ovjerena od nacionalnog strukovnog saveza (serijski broj oružja, proizvođač, kalibar municije, prateću opremu za oružje)
 - 2) za lovačko oružje - Oružni list;
- d) sredstvo transporta;
- e) datum polaska i procijenjeni datum povratka;
- f) poziv organizatora na ime pravnog ili fizičkog lica;
- g) granični prijelaz na koji će ući i izaći.

Član 4.

Privremeni uvoz, privremeni izvoz i tranzit se može odobriti za najviše tri komada sportskog, odnosno lovačkog oružja po osobi, sa pripadajućom opremom za ta oružja i određenu količinu municije po jednom komadu oružja, zavisno od kalibra oružja, i to:

- a) za sportsko oružje:
 - 1) kugla 12 mm do 500 kom;
 - 2) patrone sa sačmom 12 mm do 500 kom;
 - 3) kugla 5,6 mm do 3.000 kom;
 - 4) dijablo 4,5 mm do 5.000 kom.

b) za lovačko oružje:

- 1) patrone 4 - 36 do 100 kom;
- 2) metak 6,5-8 mm do 20 kom.

Član 5.

(1) Sportsko i lovačko oružje i municija moraju biti u ličnom prtljagu lica na koje glasi izdato odobrenje za privremeni uvoz, privremeni izvoz i tranzit.

(2) Carinski organ obavezan je da izvrši uvid u kompletan popis oružja i municije iz stava (1) ovog člana, kao i da izvrši njihovu provjeru.

(3) Organizator iz člana 3. stav (2) tačka f) treba da izda potvrdu o broju utrošenih zrna učesnika na učešću na koje su pozvani.

Član 6.

Ovo uputstvo stupa na snagu osmog dana od dana objavljivanja u "Službenom glasniku BiH".

Broj 01-01-02-8705/05
5. jula 2005. godine
Sarajevo

Ministar
Dragan Doko, s. r.
